

108.

Na osnovu člana 8. stav (3) Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09), člana 14. stav (1) Zakona o komunalnim djelatnostima ("Službene novine Zeničko-dobojskog kantona", br. 17/08 i 9/11) i člana 21. tačka 2. Statuta Grada Zenica ("Službene novine Grada Zenica", br. 5/15), Gradsko vijeće Zenica na 48. sjednici, održanoj dana 20. 8. 2024. godine, donosi

## O D L U K U

### o organizaciji i načinu naplate parkiranja na javnim parking površinama

#### DIO PRVI - OPŠTE ODREDBE

##### Član 1.

##### (Predmet)

Ovom odlukom uređuju se uslovi i način korištenja javnih parkirališta s naplatom, parkiranje za stanare, pravna i fizička lica koja obavljaju samostalnu djelatnost, parking zone, blokovi i cjenovnik usluga, korištenje parkirališta s naplatom bez parking karte, parkiranje osoba s invaliditetom, nadzor i kaznene odredbe.

##### Član 2.

##### (Značenje pojedinih pojmova)

Pojedini pojmovi upotrijebljeni u ovoj odluci imaju sljedeće značenje:

- a) pod javnim parkiralištem sa naplatom (u daljem tekstu: parkiralište) podrazumijeva se površina namijenjena isključivo za parkiranje vozila sa plaćanjem naknade za korištenje, koja je označena odgovarajućom saobraćajnom signalizacijom, informacijama o parking zoni, cijenama parkiranja i načinu plaćanja,
- b) parking mjesto je dio parkirališta koje je označeno odgovarajućom saobraćajnom signalizacijom,
- c) rezervisano parking mjesto je parking mjesto namijenjeno određenom korisniku koje je označeno odgovarajućom saobraćajnom signalizacijom,
- d) parking zona je dio parkirališta na kojoj je uvedena naplata u određenom dijelu grada,

a na kojoj se zavisno o položaju u gradu određuju naknade i uslovi za parkiranje,

- e) parking blok je dio parking zone koji obuhvata određene ulice u kojima stanari, pravna lica i fizička lica koja obavljaju samostalnu djelatnost imaju pravo parkiranja,
- f) kontrolor je ovlašteno lice davaoca usluga koji vrši nadzor nad parkiranjem vozila na parkiralištu.

#### DIO DRUGI –USLOVI I NAČIN KORIŠTENJA PARKIRALIŠTA

##### Član 3.

##### (Parkiralište)

Parkiralište je javna površina namijenjena za parkiranje vozila, izgrađena ili uređena za parkiranje vozila izvan kolovoza, kao i za parkiranje vozila na kolovozu ili trotoaru kada to dozvoljavaju uslovi odvijanja saobraćaja sa posebnim režimom korištenja za koju je pribavljena saglasnost Službe za urbanizam na osnovu posebne tehničke dokumentacije koju obezbjeđuje JP „Parking servis“ d.o.o. Zenica (u daljem tekstu: davalac usluga).

##### Član 4.

##### (Davalac usluge)

- (1) Djelatnost pružanja usluga i održavanja parkirališta povjerava se davaocu usluga.
- (2) Davalac usluge je dužan voditi redovno brigu o parkiralištu i to:
  - a) održavati vertikalnu i horizontalnu saobraćajnu signalizaciju,
  - b) održavati čistoću parkirališta,
  - c) sanirati udarne rupe.
- (3) Davalac usluge nema obavezu čuvanja vozila i ne snosi odgovornost za oštećenje ili krađu vozila.

##### Član 5.

##### (Korisnik usluge)

- (1) Korisnik usluge je vlasnik vozila koji parkira vozilo na javnom parkiralištu s naplatom, primatelj leasinga kojem je vozilo prepušteno na korištenje na temelju pravnog posla i najmpri- mac kojem je osoba koja obavlja registrovanu



djelatnost rent-a-car usluge prepustila vozilo na korištenje na temelju ugovora o najmu.

- (2) Pristupanjem vozila parkiralištu, korisnik usluge prihvata uslove parkiranja propisane ovom odlukom.

#### Član 6.

##### (Radno vrijeme)

Radno vrijeme parkirališta je:

- a) radno vrijeme parkirališta s naplatom je od 7,00 do 22,00 sata svakim radnim danom, a subotom od 8,00 do 16,00 sati,
- b) radno vrijeme na parkiralištima zatvorenog tipa je u pravilu od 00,00 do 24,00 sata svakim danom u sedmici, o čemu odlučuje davalac usluge.
- c) Državnim praznicima parking se ne naplaćuje.

#### Član 7.

##### (Obilježavanje parkirališta)

- (1) Parkiralište se obilježava horizontalnom i/ili vertikalnom saobraćajnom signalizacijom, u skladu sa propisima o sigurnosti saobraćaja.
- (2) Vertikalna saobraćajna signalizacija sadrži:
  - a) oznaku „P“ (parkiralište) - skraćeni naziv parkirališta i
  - b) dopunsku tablu sa važnim obavještenjima.
- (3) Korisnik usluge je dužan vozilo parkirati u skladu s horizontalnom i/ili vertikalnom signalizacijom, odnosno u skladu sa uputstvom koje mu daje ovlaštena službena osoba davaoca usluge.

#### Član 8.

##### (Naknada za parkiranje)

- (1) Na parkiralištu korisnik usluge je dužan platiti parking kartu.
- (2) Parking karta plaćena za zonu u kojoj se plaća viša cijena za korištenje parkinga vrijedi i u zoni u kojoj se plaća niža cijena.

#### Član 9.

##### (Parking karta)

- (1) Parking karta izdaje se u materijalizovanom ili nematerijalizovanom obliku.
- (2) Materijalizovana karta izdaje se na papiru, u obliku naljepnice ili drugom odgovarajućem obliku.
- (3) Nematerijalizovana karta izdaje se u elektronskom obliku.
- (4) Izgled i sadržaj parking karte određuje davalac usluge.

#### Član 10.

##### (Vrste parking karata)

- (1) Za parkiranje u trajanju kraćem od 24 sata izdaje se satna parking karta.
- (2) Za parkiranje u trajanju od 24 sata izdaje se dnevna parking karta.
- (3) Za parkiranje na parkiralištu može se izdati polumjesečna, mjesečna, polugodišnja ili godišnja parking karta.
- (4) Izdavanje parking karata iz stava (1), (2) i (3) ovog člana ne obavezuje davaoca usluge da za iste obezbijedi kontinuirano slobodno parking mjesto.

#### Član 11.

##### (Način plaćanja parking karte)

- (1) Plaćanje parking karte na parkiralištu može da se vrši putem: ovlaštene službene osobe davaoca usluge, poluautomatski, automatski i elektronskim putem.
- (2) Na parkiralištu na kojem se naplata vrši putem automata korisnik usluge količinom ubačenih kovanica u automat određuje dužinu trajanja parkiranja.
- (3) Korisnik usluge može izvršiti plaćanje parkinga putem SMS-a ili bankovne kartice.
- (4) Ukoliko korisnik usluge nije dobio potvrdu o uplati od strane operatera smatra se da plaćanje nije izvršeno.



- (5) Na zatvorenom parkiralištu, na kojem je naplata organizovana putem poluautomatskog odnosno automatskog sistema naplate, korisnik usluge plaća naknadu za parkiranje pri napuštanju parkirališta.
- (6) Naknada iz stava (5) ovog člana se obračunava prema podacima sa ulaznog listića.
- (7) Korisniku usluge parkirališta bez ulaznog listića obračunava se vrijeme od početka radnog vremena parkirališta.

### Član 12.

#### (Način isticanja parking karte)

- (1) Korisnik usluge je dužan istaknuti parking kartu na vidnom mjestu ispod prednjeg vjetrobranskog stakla.
- (2) Izuzetno od stava (1) ovog člana korisnik usluge je dužan, ako se parkiranje plaća elektronskim putem, sačuvati potvrdu kojom je od strane operatera potvrđeno plaćanje parkiranja.
- (3) Po isteku vremena za koje je plaćena naknada za parkiranje korisnik usluge je dužan ukloniti vozilo ili kupiti novu kartu.

## DIO TREĆI - PARKIRANJE ZA STANARE, PRAVNA I FIZIČKA LICA KOJA OBAVLJAJU SAMOSTALNU DJELATNOST

### Član 13.

#### (Parking za stanare)

- (1) Korištenje parking mjesta pod povoljnim uslovima može se odobriti za parkiranje stanara zgrada na parkiralištu unutar parking zone i pripadajućih parking blokova na kojima je uvedena naplata parkiranja.
- (2) Licima iz stava (1) ovog člana izdaje se na osnovu zahtjeva parking karta za stanare.
- (3) Uz zahtjev za izdavanje parking karte za stanare, podnosilac na uvid prilaže sljedeće:
  - a) ličnu kartu,
  - b) uvjerenje o prebivalištu - CIPS (ne starije od 6 mjeseci),
  - c) saobraćajnu dozvolu na ime podnosioca zahtjeva.

### Član 14.

#### (Parking za pravno lice i fizičko lice koje obavlja samostalnu djelatnost)

- (1) Korištenje parking mjesta pod povoljnim uslovima može se odobriti za parkiranje pravnom licu i fizičkom licu koje obavlja samostalnu djelatnost na parkiralištu unutar parking zone i pripadajućih parking blokova na kojima je uvedena naplata parkiranja.
- (2) Licima iz stava (1) ovog člana izdaje se na osnovu zahtjeva parking karta za pravno lice i fizičko licu koje obavlja samostalnu djelatnost.
- (3) Uz zahtjev za izdavanje parking karte za pravno lice i fizičko lice koje obavlja samostalnu djelatnost, podnosilac na uvid prilaže sljedeće:
  - a) rješenje o registraciji subjekta, odnosno rješenje o obavljanju djelatnosti,
  - b) saobraćajnu dozvolu za službena vozila,
  - c) dokaz da je vlasnik, odnosno korisnik poslovnog objekta na navedenoj adresi (ovjeren ugovor o vlasništvu, ovjeren ugovor o zakupu).

### Član 15.

#### (Izdavanje parking karte)

- (1) Parking karta iz člana 13. i 14. ove odluke izdaje se nakon izvršenog uvida o ispunjenju uslova i važi samo za parkiralište za koja je izdata.
- (2) Davalac usluge garantuje korisniku usluge iz člana 13. i 14. ove odluke parking mjesto za parkiralište za koje je izdata.
- (3) Korisnik usluga iz člana 13. i 14. ove odluke je obavezan davaocu usluge prijaviti prodaju ili zamjenu vozila ili promjenu registarskih oznaka vozila za koje je izdata parking karta.

## DIO ČETVRTI - PARKING ZONE I BLOKOVI

### Član 16.

#### (Parking zone)

Parkirališta se razvrstavaju u sljedeće parking zone:

- a) Ekstra parking zona (0) - obilježava se crve-



nom bojom i obuhvata područje omeđeno ulicama Talića brdo, Bulevar Ezhera Eze Arnautovića, GGM i Školska.

- b) Prva parking zona (I) - obilježava se žutom bojom i obuhvata područje omeđeno ulicama GGM, Štrosmajerova, Armije BiH, Bulevar Ezhera Eze Arnautovića, Bulevar kralja Tvrtka I i Bulevar Kulina bana isključujući područje određeno Ekstra parking zonom.
- c) Druga parking zona (II) - obilježava se plavom bojom i obuhvata preostalo područje grada.

### Član 17.

#### (Parking blokovi)

- (1) Parking zone su sačinjene od sljedećih parking blokova:
- a) 0 (Ekstra) parking zona dijeli se na sljedeće parking blokove:
- Blok 1 – prostor omeđen ulicama Jevrejska, Talića brdo, Mejdandžik, Bulevar Ezhera Eze Arnautovića,
  - Blok 2 – prostor omeđen ulicama Jevrejska, Titova, Zukići i GGM (Branilaca Bosne),
  - Blok 3 – prostor omeđen ulicama GGM, Mejdandžik, Zukići,
  - Blok 4 – prostor omeđen ulicama Safveta bega Bašagića, Titova, GGM (Branilaca Bosne), Bulevar Ezhera Eze Arnautovića,
  - Blok 5 – prostor omeđen ulicama Safveta bega Bašagića, GGM (Branilaca Bosne), Bulevar Ezhera Eze Arnautovića i Školska.
- b) I (prva) parking zona dijeli se na sljedeće parking blokove:
- Blok 6 – prostor omeđen ulicama Školska, GGM (Branilaca Bosne), A.A.Borića i Masarykova,
  - Blok 7 – prostor omeđen ulicama Školska, Bulevar Kulina bana, A.A.Borića i Masarykova i fra Grge Martića,
  - Blok 8 – prostor omeđen ulicama Bulevar
- Kulina bana, A.A.Borića, fra Grge Martića i Bulevar Kralja Tvrtka I,
  - Blok 9 - prostor omeđen ulicama GGM, Štrosmajerova, Armije BiH i Uzunovića put,
  - Blok 10 - prostor omeđen ulicama Uzunovića put, Štrosmajerova i Armije BiH,
  - Blok 11 - prostor omeđen ulicama GGM, Londža, Talića brdo i Begagića put,
  - Blok 12 - prostor omeđen ulicama GGM, Londža, Begagića put i Muftije Šemsekadića,
  - Blok 13 - prostor omeđen ulicama GGM, Londža, Muftije Šemsekadića i Mehmeda Spahe,
  - Blok 14 - prostor omeđen ulicama GGM, Londža, Mehmeda Spahe i Bulevar Ezhera Eze Arnautovića,
  - Blok 15 - prostor omeđen ulicama Londža, Bulevar Ezhera Eze Arnautovića, Talića brdo i Vojvodića put,
  - Blok 16 - prostor omeđen ulicama Londža, Bulevar Ezhera Eze Arnautovića, Vojvodića put i Jalijski put,
  - Blok 17 - prostor omeđen ulicama Londža, Bulevar Ezhera Eze Arnautovića i Jalijski put.
- c) II (druga) parking zona dijeli se na sljedeće parking blokove:
- Blok 18 – naselje Radakovo,
  - Blok 19 – naselje Babina Rijeka,
  - Blok 20 – naselje Crkvice između ulice Crkvice i Babine rijeke,
  - Blok 21 – naselje Crkvice između ulice Crkvice i ulice Ivana Gundulića,
  - Blok 22 – naselje Lukovo Polje,
  - Blok 23 – naselje Bilmište,
  - Blok 24 – naselje Nova Zenica između ulica GGM i ulice Juraja Neidharta,



- Blok 25 – naselje Nova Zenica između ulice Juraja Neidharta i Adolfa Goldbergera,
- Blok 26 – naselje Nova Zenica između ulica Adolfa Godlbergera i Saliha Cakana Mulalića,
- Blok 27 – naselje Nova Zenica između ulica Saliha Cakana Mulalića i Bulevara Kralja Tvrtka,
- Blok 28 – naselje Blatuša između ulice Željeznička i Kranjčevićeva,
- Blok 29 – naselje Blatuša između ulice Željeznička i Zije Dizdarevića,
- Blok 30 – naselje Blatuša – između ulica Blatuša i Kranjčevićeva,
- Blok 31 – naselje Blatuša – preostali dio.

#### **DIO PETI - CJENOVNIK USLUGA, PARKING ZA OSOBE SA INVALIDITETOM I IZMJEŠTANJE VOZILA**

##### **Član 18.**

###### **(Cjenovnik usluga)**

Cjenovnik usluga korištenja parkirališta i troškova izmještanja i čuvanja vozila utvrđuje Nadzorni odbor uz saglasnost Gradonačelnika.

##### **Član 19.**

###### **(Korištenje parkirališta bez parking karte)**

Korištenje parkirališta bez kupljene parking karte, dozvoljeno je u toku interventnih akcija službenim vozilima ministarstva unutrašnjih poslova, hitne pomoći, vatrogasnim vozilima, inspekcijskim organima Grada Zenica i vozilima komunalnih preduzeća u vlasništvu Grada Zenica.

##### **Član 20.**

###### **(Parking za osobe sa invaliditetom)**

- 1) Na parkiralištu izvodi se 5 % +1 pristupačno parking mjesto u odnosu na ukupni broj parking mjesta.
- 2) Na posebno obilježenim mjestima rezervisanim za parkiranje vozila osoba s invaliditetom, parkiranje se vrši bez plaćanja naknade uz isticanje važećeg znaka pristupačnosti.

- 3) Na parkiralištima koja nisu posebno obilježena kao mjesta rezervisana za parkiranje vozila osoba s invaliditetom, osobe s invaliditetom koje na vozilu imaju istaknut važeći znak pristupačnosti imaju pravo parkirati bez plaćanja naknade najduže dva sata tokom jednog dana.
- 4) Osoba s invaliditetom može ostvariti pravo iz stava (3) ovoga člana ako uz važeći znak pristupačnosti istakne i posebnu kartu koju izdaje davalac usluge.
- 5) Izgled i sadržaj naljepnice iz stava (5) ovoga člana određuje davalac usluge.

##### **Član 21.**

###### **(Izmještanje vozila)**

- 1) Ukoliko korisnik usluge parkira vozilo na mjesto predviđeno za parkiranje stanara, pravnih lica i fizičkih lica koja obavljaju samostalnu djelatnost bez odgovarajuće parking karte, davalac usluge izmješta vozilo korisnika usluge o trošku korisnika usluge.
- 2) Ukoliko korisnik usluge nije parkirao vozilo u skladu sa odredbama člana 7. stav (3) ove odluke vozilo se izmješta o trošku korisnika usluge bez obzira na posjedovanje parking karte.
- 3) Ukoliko je počinitelj prekršaja iz člana 25. ove odluke stranac, vozilo se izmješta o trošku korisnika usluge.

#### **DIO ŠESTI – NADZOR**

##### **Član 22.**

###### **(Nadzor)**

Nadzor nad primjenom ove odluke vrši nadležna gradska Služba za inspekcijske poslove i JP „Parking servis“ d.o.o. Zenica.

#### **DIO SEDMI- KAZNENE ODREDBE**

##### **Član 23.**

###### **(Prekršaj)**

U slučajevima kada ovlašteno lice subjekata iz člana 22. ove odluke utvrdi učinjenje prekršaja, izdaje prekršajni nalog ili podnosi zahtjev za pokretanje prekršajnog postupka nadležnom sudu, u skladu s odredbama Zakona o prekršajima.



**Član 24.****(Prekršaj davaoca usluge)**

Novčanom kaznom od 500,00 KM do 1.000,00 KM kaznit će se za prekršaj davalac usluge, a u iznosu od 50,00 KM do 100,00 KM odgovorno lice davaoca usluge ako ne postupi po odredbama člana 4. stav (2) ove odluke.

**Član 25.****(Prekršaj korisnika usluge)**

Novčanom kaznom u iznosu od 40,00 KM kaznit će se za prekršaj korisnik usluge, ako:

- a) nema parking kartu,
- b) ne istakne parking kartu na vidljivo mjesto u vozilu, u skladu s uputstvima na parking karti,
- c) prekorači dopušteno vrijeme parkiranja,
- d) ne prijavi davaocu usluge zamjenu vozila ili promjenu registarskih oznaka vozila za koje je izdata parking karta,
- e) ne parkira vozilo u skladu s vertikalnom i/ili horizontalnom signalizacijom, odnosno u skladu sa uputstvom koje mu daje ovlaštena službena osoba davaoca usluga.

**Član 26.****(Prihod od novčanih kazni)**

Novčane kazne naplaćene po članu 24. i 25. ove odluke su prihod davaoca usluge i koriste se kao namjenska sredstva za unapređenje stacionarnog saobraćaja na teritoriji grada Zenica.

**DIO OSMI - ZAVRŠNE ODREDBE****Član 27.****(Prestanak važenja ranijeg propisa)**

Danom početka primjene ove odluke prestaje da važi Odluka o organizaciji i načinu naplate parkiranja ("Službene novine Općine Zenica", broj 6/04).

**Član 28.****(Stupanje na snagu)**

Ova odluka stupa na snagu osmog dana od dana objavljivanja u Službenim novinama Grada Zenica, a primjenjivat će se od dana kada davalac usluge dobije

potrebnu saglasnost od strane Federalnog ministarstva pravde i rješenje Agencije za identifikacione dokumente, evidencije i razmjenu podataka (IDDEEA).

Broj: 01-45-16715/24

Zenica, 20. 8. 2024. godine

PREDSJEDAVAJUĆI  
GRADSKOG VIJEĆA

Mirza Husetić, s.r.

**109.**

Na osnovu člana 13. stav (2) alineja peta Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06 i 51/09) i člana 21. tačka 7. Statuta Grada Zenica ("Službene novine Grada Zenica", br. 5/15), Gradsko vijeće Zenica na 48. sjednici, održanoj dana 20. 8. 2024. godine, donosi

**ODLUKU**

**o povjeravanju postojećeg parkinga u naselju Jalija, te dijela zelenih površina na kojim će biti formiran novi parking na upravljanje, korištenje, unapređenje i održavanje JP „Parking servis“ d.o.o. Zenica**

**Član 1.**

Ovom odlukom Grada Zenica povjerava se JP „Parking servis“ d.o.o. Zenica, a u skladu sa Elabratom, koji čini sastavni dio ove odluke, zemljište na parcelama označenim kao k.č.n.p. 896/1 i 1130/1 k.o. Zenica II za formiranje, upravljanje, korištenje, unapređenje i održavanje parking prostora, bez naknade.

**Član 2.**

Postojeći parking prostori će biti sanirani i prilagođeni za savremeni način parkiranja, uz uređenje postojećih parkirališta, a na dijelu preuzete parcele će biti izgrađen novi parking za korisnike usluga parkiranja.

**Član 3.**

Sastavni dio ove odluke je Elaborat uređenja stacionarnog saobraćaja na lokaciji MZ „Jalija“ od maja 2024. godine, pripremljen od strane JP „Parking servis“ d.o.o. Zenica, u kojem je definisana organizacija stacionarnog saobraćaja, broj i postavka postojećih parking mjesta koja će se urediti, lokacija, postavka i broj novih parking mjesta koja će se izgraditi.